



ҮКІМЕТТІҢ БАСТЫ МІНДЕТІ – ХАЛЫҚТЫҢ ӘЛ-АУҚАТЫН АРТТЫРУ

Президент Қасым-Жомарт Тоқаевтың төрағалығымен бейнебайланыс режимінде Үкіметтің кеңейтілген отырысы өтті. Жиынға Премьер-Министр Әлихан Смайылов, Мемлекеттік хатшы Ерлан Қарин, Президент Әкімшілігінің басшысы Мұрат Нұртілеу, Үкімет мүшелері, облыстар мен Нұр-Сұлтан, Алматы, Шымкент қалаларының әкімдері, орталық мемлекеттік органдардың және ұлттық компаниялардың жетекшілері қатысты.

Мемлекет басшысы жиында сөйлеген сөзінде еліміздің былтырғы әлеуметтік-экономикалық дамуы қорытындыланып, биылғы жоспардың талқыланатынын атап өтті.

– Өткен жылы ел экономикасы 4 пайызға өсті. Өңдеу өнеркәсібі 5,5, құрылыс индустриясы 7,6 пайызға артты. Қызмет көрсету саласында оң үрдіс бар. Сауда-саттық 9,2, көлік саласы 3,6 пайызға артты. Дегенмен инфляция межелі деңгейден асып кетті. Бұл көрсеткіш 8,4 пайыз болды. Өкінішке қарай, «Қаңтар оқиғалары» қалыпты өмірімізді түбегейлі өзгертті. Зансыз әрекеттердің салдарынан көптеген азаматтарымыз зардап шекті. Шағын және орта

бизнес өкілдері шығынға ұшырады. Қазіргі мәліметтер бойынша бизнеске 100 миллиардтан астам теңге көлемінде залал келді, – деді Президент.

Қасым-Жомарт Тоқаев еліміздің пандемияға, іскерлік белсенділіктің төмендеуіне және ұлттық қауіпсіздікке төнген сын-қатерлерге байланысты күрделі кезеңді бастан өткеріп отырғанына назар аударды.

– Біз осындай қиын жағдайда ел бірлігінің арқасында мемлекетіміздің қауіпсіздігін, тіпті тұтастығын сақтап қалдық. Қазір Үкіметтің басты міндеті – халықтың әл-ауқатын арттыру, азаматтардың табысындағы алшақтықты азайту және еңбек етуге қолайлы жұмыс орындарын ашу. Бәріміз елдің игілігі үшін қызмет етуге тиіспіз, – деді Мемлекет басшысы.

Президенттің пікірінше, халықтың табысын арттыру және теңсіздікті азайту басым міндеттің бірі.

– Қазір 1 миллионға жуық адамның табысы ең төменгі күнкөріс деңгейіне де жетпейді. Бұл – соңғы 10 жылдағы ең нашар көрсеткіш. Қазіргі уақытта менің тапсырмам бойынша Халықтың табысын арттыруға арналған бағдарлама әзірленіп жатыр, – деді Қасым-Жомарт Тоқаев.

(Жалғасы 2-бетте)

Жалған ақпарат жарға жығады



Орталық коммуникациялар қызметінде өткен брифингте Бас прокуратура мен Ішкі істер министрлігінің өкілдері «Қаңтар оқиғаларының» себептерін анықтау, жалпы тергеу барысы туралы айтып берді.

ҚР Бас прокуратурасының арнайы прокурорлар қызметінің бастығы Ризабек Ожаровтың айтуынша, мұндай жұмыстар еліміздің сегіз өңірінде: Алматы мен Шымкент қаласы, Алматы, Жамбыл, Қызылорда, Шығыс Қазақстан, Ақтөбе және Атырау облыстарында жүріп жатыр. Дәл сол жерлерде адам өлімі, бүлікшілік, өрт салу, мемлекеттік және жеке нысандарды қирату көп болған.

3»

Шекарадағы Марқакөл жеке аудан бола ма?

Шекара шебіндегі, елдің шеті, желдің өтіндегі бұрын өз алдына аудан болған өңірдің тұрғындары «ауданымыз қайта ашылып, айымыз оңынан туар ма екен?» деген үкілі үміттің жетегінде жүр. Әсіресе, марқакөлдiктердiң ең басты арманы да – осы.

ПРЕЗИДЕНТ ПӘРМЕН БЕРДІ, ҮКІМЕТ НЕГЕ ҮНСІЗ?

Иә, бұған себеп те жоқ емес. Былтыр қараша айында өткен Ұлттық қоғамдық сенім кеңесінің VI отырысында Президент шекаралық аудандарды дамыту бағдарламасын дайындау туралы тапсырма беріп: «Шекара маңын бос қалдыруға болмайды. Бұл – ұлттық қауіпсіздікке тікелей қатысы бар мәселе. Оны жүйелі түрде шешу қажет. Қомақты қаражат керек болады. Үкіметке мұны жан-жақты қарастырып, шекаралас аймақтарды дамыту жөнінде ұсыныс енгізуді тапсырамын» деген болатын.



7»

Президент Ресейге барады

10-11 ақпанда Қазақстан Президенті Қасым-Жомарт Тоқаев Владимир Путиннің шақыруымен Ресей Федерациясына қысқамерзімді жұмыс сапарымен барады. Бұл туралы Президенттің баспасөз хатшысы Берік Уәли Facebook парақшасында жазды.

10 ақпанда Мәскеуде Қасым-Жомарт Тоқаев Владимир Путинмен келіссөз жүргізеді. Кездесу барысында мемлекеттер басшылары Қазақстан мен Ресей арасындағы көпжақты стратегиялық серіктестіктің даму перспективаларын қарастырады.

11 ақпан күні Мемлекет басшысы Қазан қаласында Татарстан Президенті Рустам Миннихановпен кездеседі және республикадағы бірқатар ірі өнеркәсіптік кәсіпорындарды аралап көреді.

Оффшордағы ақша орала ма?

Қазақстаннан оффшор аймақтарға 160 млрд доллар шығарылған деген дерек жарияланды. Ғаламат ақша. Бұған дейін де заңды, заңсыз жолмен нарықтан біраз қаражат қыр асып жатқанын Бас прокуратура да мәлімдеген еді. Енді оларды қайтару мүмкін бе? Ол үшін не істеу қажет? Тағы да Статидың ісі секілді сансыз әрі құны қымбат сот бастала ма?

Ресми дерекке сүйенсек, соңғы бес жылда республиканың құқық қорғау органдары шетелге заңсыз қаржы шығару фактілері бойынша 200-ден астам іс қозғаған. Алайда тексеріс нәтижесі қалай болғаны, ақша жымқырғандарға қандай шара қолданылғаны жөнінде нақты мәлімет жоқ. Сондай-ақ кейбір олигархтардың «қасіретті қаңтар» кезінде Қазақстаннан жеке ұшақтармен өздері ғана кетіп қалмай, шетелдегі есепшоттарға қыруар қаржы аударғаны туралы деректер айтылып жүр. Осы жайттарға байланысты Мәжіліс депутаты Мақсат Раманқұлов Үкіметке сауал жолдады.

ШЕКАРА АСҚАН ҚАРЖЫҒА ТОҚТАМ БАР МА?

«Қаржы мониторинг агенттігі құрылғаннан бері Қазақстан экономикасына оффшорлық аймақтардан нақты қанша қаражат қайтарылды? Қаңтардағы қайғылы оқиғалар кезінде қандай



елдерге ірі көлемде қаражат аударылды, оны кімдер шығарды, ол кімдердің шотына түсті? Осы күрделі сұрақтарды қолға алмай, капиталдар шығарылды деген күдігіміз бар. Ол адамдар өздерінің тағдырын Қазақстанмен байланыстырмаса, қалаған жерлерінде қала берсін. Бірақ шығарылған қаражат халықтан ұрланған бол-

са, елімізге қайтарылып, экономикаға жұмыс істесін», – деді депутат. Ол сондай-ақ мұндай фактілер бойынша құзырлы органдар қаржының шығу заңдылығын анықтауға және олардың тиісті салықтарды төлеген-төлемегенін тексеруге міндетті екенін еске салды.

(Жалғасы 4-бетте)

Қауіпті қоқыс – табысты бизнеске айналмасын!

Пандемия құшағындағы соңғы 2 жыл адамзатқа денсаулықтың зор байлық екенін іс жүзінде дәлелдеді. Сын сағатында біздегі дерттің алдын алу, емдеу, сауықтыру ісінің «жүйкесі» сыр берді. Сонда да болса көпшілік бетперде тағып, вакцина салдырып, қауіпті вирусқа қарсы қарекет қылып жатты. Есесіне пайдаланылған бетперделер мен вакцинадан босаған құтылар медициналық қалдықтарды талапқа сай залалсыздандыру мәселесін күн тәртібіне шығарды.



Пандемия «қоқысына» қарсы күресті бүгінде әлем елдері коронавирус инфекциясының таралуына тойтарыс берумен тең дәрежеде қарастырады. Сондықтан өзгелер бейберекет шашылған бетперделер мен бірге вакцинадан босаған құтыларды талапқа сай жою ісін мықтап қолға алды. Олай болатын жөні де бар. Дүниежүзілік денсаулық ұйымы 2020 жылдың наурызы мен 2021 жылдың қарашасы аралығында әлемде 87 мың тонна жеке қорғаныш құралы пайдаланылды деген дерек таратты.

5»

Қат дәрілердің құны да қымбат

Әлемдегі ең қымбат дәрілердің бағасы – 1 миллиард теңге. Қазақстанда тіркелмеген, тіпті ел аумағына кіргізу мүмкін емес Zolgensma препаратын АҚШ-тан табуға болады. Қазақстанда 1 жас 7 айлық Айсезімге бұлшық атрофиясы дерті жармасып, ғұмырын сол дәріге бағынышты етті. Сауығып кетуі үшін аталған препарат оған 2 жасқа дейін салынуы керек. Қаржы жинауды бұлдіршінің ата-анасы былтыр наурыз айында бастаған. 11 айдан кейін еліміздегі белгілі әнші-актерлер, ақындар, блогерлер, кәсіпкерлер бастап, халық қолдап, жансақтау бөлімінде жатқан Айсезімнің еміне қажетті қаржыны топтастырды. Қат дәрінің қымбат болуының себебі неде? Құны көкке ұшқан тағы қандай дәрілер бар? Бастысы, науқасты ажалдан арашалай ала ма?



ДӘРІГЕ БАЙЛАНҒАН ҒҰМЫР

Арқа бұлшық ет атрофиясы – генетикалық ауру, оның кесірінен адамның барлық бұлшық еті семіп, салдарынан өліп кетуі мүмкін. Денсаулық сақтау министрлігі елде бұл диагнозбен қанша адам ауыратынын нақты айтпайды. Қазір оны бюджет қаражаты есебінен емдеу хаттамасына енгізді. Бір ампуланың құны – 50 миллион теңге. Осындай алты ампулаға бір жылға өтінім берілді. Бірақ нусинерсен (спинраза) препаратын өмір бойы қабылдау керек.

6»

